



833518

容城孫鍾元先生文集卷之三

傳

鹿太公傳

太公名正號成宇侍御豫軒公長子太常伯順父也
侍御宦游公拮据家務一意以明農課子爲已任故
侍御公無憂內顧太常未嘗北面一塾師而業就生
平勤儉持家卹人之急甚於已當厄之與寧直無難
色恒慮人有難盡之言也公表弟劉正心以一言之
諾養其妻子終身爲之娶婦者二嫁女者二蓋慷慨
好施自其天性與人不設城府不岐而背臨事嶄然
三賢文集 徵君卷之三 一

有斷性簡朴聲色服御去之若免惟孝友節義以此
誨人并以自律侍御公寢疾躬侍湯藥衣不解帶者
三年嘗一夕數起履屨几榻間微聞侍御欠伸狀卽
屏息而俟早夜禱瘳頭鬚爲白其侍母夫人日夕依
戀伯順常一再迎養京邸席未煖而歸裝是束曰奈
何戀游子而牽堂上老人遠思也七十歲居母喪猶
寢苦食淡哭泣如禮終身之慕殆謂是與篤念手足
與弟直友歡垂白無間鰥居日伯順欲擇一侍子奉
起居公不與日若以而翁爲苦耶吾自覺無不足處
且此事蚤已看破故無一可者風雨蕭然彌發嘯詠



性不解飲而雅好客流連下榻丙夜不倦客或請少
休則謂君豈以老夫爲醒眼君輩舉爵吾汨汨亦若
有酒腸也枯棋三百拉一二同調磔礮其間竟日對
壘並忘勝負制詞有溪山寄傲覺海鷗猶有機心木
石與居笑雲鶴仍無定性得公神矣恩命三錫年登
八旬每出入安步閑中卽往返百餘里亦止一僕一
騎無異布衣時日吾幸未億庶幾與里閭故舊遇諸
塗何可使其引避而轍迹畏人將無挾兒輩尊寵於
車上儼哉有司至門恒踰垣以避歲請鄉飲始勉一
赴後絕不往孫化麟中辛酉解元製一褐袍伯順自

三賢文集

徵君卷之三

二

塞上歸一裘爲壽公復嚴戒之嘗謂生不能挽流習
而席祖父以自張藉子孫以自奉此其人殊堪嗚噓
蓋公以高風古韻生平爲王彥方陳太丘逾四十年
鄉里蒸蒸何諭家庭間矣至天啓中璫禍起網羅密
布一時如左魏周諸君子皆伯順密友俱遭禍三家
子弟賓客絡繹江村謀所以爲左右力公挺身周旋
不計禍患甚至釀金應比聲聞長安旁觀者代爲公
危公不顧第曰老人籌此已熟矣不知命無以爲君
子我豈肯惜一身爲吾子蘭籍辱崇禎朝已已之變
范撫軍入援公湊粟五百餘石犒師嘗割腹地數十

畝代合族貼軍其仗義急公類如此當伯順發金花
落職後復從高陽相國督師淪水人皆爲公慰且危
公獨掀髯長笑曰臣子不當如是耶持祿養交非吾
子事且如先侍御抗言大節何迨伯順殉難猶毅然
曰得其死矣世受國恩可借此以報九廟之靈亦復
何恨觀此公所自處與爲子處無論富貴於生死又
何如也公嘗擁五世子於一堂人倫之盛海內寡二
後以孫化麟爲父叩關悴死終不勝鬱痛以歿海內
聞而悲之乃余猶不能無感余於公以猶子待乃不
督過若以孺子可教也歲時風雨譚塵碁枰遇余必
三賢文集 徵君卷之三 三
色飛卽忿怒激切時徐出一言無不立解不知何以
得此於公也余交伯順四十年公四十年如一日後
子孫之殞及公病以迨屬纊余無一時不侍左右屢
欲爲傳顧痛不能屬筆聊述其槩如此亦承公之素
命也

金忠節傳

金鉉字伯玉先武進人後籍順天少有慧質讀書目
數行下天啓丁卯順天鄉試第一明年戊辰成進士
乞教授爲讀書地授揚州教諸生先德業而後文藝
燕居言行俱有規格諸生凜凜事之若耆宿轉國子

監博士辛未陞工部都水司主事命修理安定四門
軍器時中官張彛憲總理戶工二部錢糧令建公署
侍郎高弘圖罷去憲向諸司官索儀注公疏力請止
之謂廉恥不可不維浮費不可不惜公署既建勢必
強司屬匍匐於獨踞之庭卽請臣矯矯自好當亦不
爲內臣屈而其中保無暮夜多慚寡廉鮮恥以自行
其私者乎不報彛憲上任移檄令兩部司官行謁見
禮公具監臣移檄非體一疏極言彛憲亢顏昧心妄
自尊大以皇上迪簡之臣子而令其磨折僂僕將置
自有之堂屬別行誣妄 之儀臣委質聖朝自矢無
玷斷不敢匍匐刑餘之庭致罹交結之條也得旨各
官遇有職事相關自當禮見其餘不必通謁彛憲益
啣公適部差抽分杭州公告病回籍彛憲以驗放火
器炸損誣叅竟落職公有自訟一疏閉門讀書究心
物理性命之學悉取五經四子書暨諸儒語錄研思
博覽毛詩春秋周禮俱有解於易更有所窺有悟卽
筆記之嘗言善易者不譚易也劉宗周爲少司空嘗
就公論學與陳龍正史可法朱之馮道德經濟互相
勸勉公貧約自甘所居不蔽風日中外有以起廢言
者公絕不問讀書之外輒靜坐每謂人口人苦不學

學則未有不日進者性至孝父病衣不解帶者數月
辛巳父卒於丹陽號泣奔喪僅存皮骨卽葬於武進
祖塋癸未當路交章推轂得旨起用銓部卽欲啓事
公以服未闋力辭甲申二月三日服除四日卽補兵
部車駕司主事巡視皇城職司禁門守軍先是皆中
使虛冒公下令嚴禁代者懲不到者革中使畏其剛
直相戒勿犯逆鬪勢迫陷大同公疏請撤宣府中官
監視恐於中掣肘不無憤事之虞尙任撫臣必賊騎
不敢窺宣也不報未幾內監迺賊宣撫朱之馮城頭
蓋節公聞馮殉難擬抗疏請聖駕南遷以時迫不果
三賢文集 徵君卷之三 五
謂其弟曰宣鎮陷都城不守矣我死分也惟無以處
母曰不瞋弟欲奉母隱母不允曰我受皇恩爲命婦
夫無生理宅中井可入也城陷易朝服拜母而哭曰
見職在皇城他非死所趨至御河邊賊已入公指賊
大罵解牙牌付長班劉元向闕拜元牽衣不釋公髮
指目裂以手捶責衣冠躍入水中死母章知公殉御
河卽投井死妾王氏從之弟諸生餘城陷卽自縊爲
家人解救痛母兄殉後數日亦投井死公屍不可復
識弟鏡僅認髮與網殮以衣冠葬於御河邊南渡贈
太僕少卿謚忠節母贈恭人仍建坊旌表公殉難時

年僅三十有五生平弱不勝衣訥然如不出口篤志力行不蹈文人之習氣節士之矜激處困能亨在險能動而義之所在有千萬人不可奪之志真所謂學道人歟有宋儒四子合刻行世歿後仲弟鏡梓其遺集八卷

居士曰余初於甲戌識公公被放里居時也公每事思退嘗云易三百八十四爻未聞有退凶者閉戶十二年讀書窮理甫起官卽以致命遂志人遂以爲節士不知理學忠節未始有二不窮理而甘蹈白刃者有之未有能窮理而不能致命遂志者

三賢文集 徵君卷之三 六

也一時之所爲也吾鄉以理學忠節者二公與定興之鹿氏鹿之學近陸王公之學守程朱至居敬致知四字又能發程朱未發之蘊聞朱勉齋氏嘗與公論學曰盡人倫體天理公極服其知要公之自得深矣

賀景瞻傳

崇禎甲申二月二十二日逆闖至獲嘉原任武德道兵備賀仲軾同妻恭人王氏妾李氏張氏王氏死之公名仲軾字景瞻衛輝之獲嘉人四世祖雄以典膳起家雄生春恩貢春生國清封工部營繕司郎中國

清生盛瑞以進士歷官叅議字鳳山爲營部郎以清直著是爲公父公少而近癡嗜讀無他好當重九日鳳山先生令家僮攜壺榼導公出遊酒斟食設公一無所顧及歸鳳山問故曰偶拈一題遂忘登高耳公夙有疾鳳山切惟疾之憂公三年居宿於外絕暈酒疾得瘳十八歲里選癸卯二十四歲舉於鄉庚戌成進士甫釋褐具疏批鱗忠直之氣中外欽仰筮仕陝西醴泉令邑故刁悍里胥作奸公力清錢糧諸弊分較秋闈稱得士以外艱歸讀禮嚴肅戶外事一無所問服闋補松江之青浦青冠紳之藪也書牘無虛日

三賢文集

徵君卷之三

七

公誓不以法假人江南故有投獻之弊公下令曰田歸紳士役仍本人請者紛紜槩謝不應征比錢糧不煩鞭笞訟牒卽令本訟人追呼監司臺使者至不飾厨傳供帳文學孝秀季有試月有會漕粟官民屯悉貯於倉粟穢雜責在民耗抑勒責在軍軍與民兩得其平暇修樓榭葺葺橋梁爲海忠介新祠宇禮逸士陳眉公在諸要人右庚申陞刑曹主事具疏訟父鳳山先生寃先是鳳山爲繕郎經營乾清坤寧兩宮力塞漏卮杜絕請託不二年以銀六十八萬竣役實省在庫九十三萬其嗣在繳奏前費一百二十萬皆取美

秩去而鳳山竟爲異己者中以考功法公據實奏辯
得旨下部雖爲忌者所抑然公論已明癸亥遷本部
廣東司員外隨陞本部福建司郎中戶部太倉老庫
失銀主者直叅前任湯道衡奉旨逮訊公以茫無確
證具疏駁之湯得釋是年冬公遷鎮江守治郡事一
如治青浦巡沿御史駐鎮運船不敷漕使者欲分派
諸運船弁借口船重恐有沉溺公曰該弁恐妨私貨
耳運糧美差也但下令有敢任灑派餘米卽行更易
領運漕使如其言無復有作梗者先是黔中用兵募
鎮弁有能運餉至黔酌以衛印指揮戴天錫先往竣
三賢文集

徵君卷之三

八

役而衛弁持印不讓出令者置不問公曰如此何以
信後鑽刺者多方夤緣屢借上官爲奧援公具文力
爭曰天下事遇難苦則能者職其勞遇安逸則狡者
享其利才知之士所以吞聲而天下事卒至不可收
拾此寧直爲一戴弁地耶上官竟不能奪丹陽姜志
禮以忤魏黨罷歸一日部劄逮趙冢宰南星招中并
無姜應勘問而尾後書姜志禮三字院檄下道行府
提勘公曰姜係四品京堂不奉旨誰敢擅提具文回
道道嚴駁公曰固知不行提必得罪然以此獲罪所
不敢辭若今日奉時局異日者以擅提四品京堂罪

余余何辭擇禍莫若正守之不移丁卯陞西寧道兵備因爲瑞賢私人所劾奏草場變價有負厥臣急公之意鐫級不果行辛未家居作春秋歸義至諸撰論翻駁古今成案獨伸胸臆之所欲言壬申寇警日迫公捐穀百石爲修築置械器癸酉三月寇薄城公宿學宮爲自靖之地忽有武德之報所屬二十城交際一絲不受道有三營兵馬公痛懲積弊勵精振刷嚴沙汰利械器公賞罰清占役積其銀爲買馬置火器後敵薄城所賴以禦禦者卽公所備也御史袁化中是同楊大洪濂諸忠死逆瑞者久未葬公捐金爲

三賢文集

徵君卷之三

九

襄其事歸家日課弟侄閉戶著書甲申二月寇氛相逼所在納款公撫心太息二十二日僞官到縣公欲罽賊死徑行素謂公曰伯無官守可不死不如詣闕直陳死君父前攜家抵石駝莊公曰恐路梗不能達死小盜手無益復歸至合河僞官要公入城公大怒曰賊敢見我乎吾必罽之擊之謂弟侄曰道三仁與不仁而已矣出此入彼再無騎牆事一生功力在此一日吾今得死所復到巨栢莊祖居具衣冠北向拜闕繼登塋辭祖考題齋壁曰吾家自典膳祖以來受朝廷恩厚及今一百七十餘年國家一旦有急不以

死報何以對吾皇何以見吾祖考况河北千里名區豈可無一殉義之臣妻妾輩余不忍手刃有願從死者共彰大義隨吾同墓不願者吾亦不强也卽登樓呼童取酒與弟侄輩談笑自若復手書今日方知賀景瞻促弟侄下樓扇其尸縊於東閭梁上北向對君也妻恭人王氏西向從夫也妾三人俱縊於西閭梁上以次東向侍至也是日天忽晝晦烈風折木伐屋人以爲忠憤之氣所感云歷三晝夜顏色如生僞官亦驚嘆羅拜年六十五歲一子敏猷廩生入太學先公卒嗣孫振能弱冠補諸生公兩爲令由部而郡而三賢文集

徵君卷之三

十

道歷任既久當就義時僞官籍其家俸金不足三百兩清直孤憤到處認真不輕許可人余來蘇門聞公殉義事思設蕭允之薦其猶子孝廉行素以狀來委作傳且以一門從容就義未得邀一卹典爲疚余日忠臣不有其身何論身後之名元公爲諸儒宗而得謚乃在諸儒後豈德未至而學不足耶知有淺深時有顯晦故也鳳山先生竭忠盡瘁而反以不職論去忠臣孝子一有計名之心則忠孝便不足色忠臣不計名實是其名忠臣不言命志是其命跡公生平蓋以孝作忠忠而聞道者也公著有栢園初草冬官紀

事春秋歸義八卦餘生等集共八十四卷

張元美傳

羅俊字元美清苑人性端毅尚氣節居恒以綱常名
教自勵幼娶雙瞽女敬好無間言竟不置媵妾諸生
詩弟羅彥蚤通顯羅俊淡寧自守刻勵古行崇禎丙
子魁於鄉絕不事干謁不阿權貴事不苟一時之便
凡三黨事悉倚之癸未成進士以觀政給假家居甲
申聞逆賊李自成擁數萬衆入太原破寧武由居庸
而北所過城邑紳吏皆望風降羅俊憤謂弟光祿曰
吾等身受國恩不一世事急矣當堅守保定遏賊勢
三賢文集 徵君卷之三 十一
以蔽京師不則寧以死殉固臣子之義也賊將劉宗
亮犯畿輔過河間將嚮保定羅俊數月前傳帖首倡
效死勿去之義忠憤之氣感動全城乃分旆環嚴號
令守浹月益堅至三月李建泰兵入保定其卒爲賊
來說降羅俊守東面手擒之以示衆賊曰京城已陷
守城何爲羅俊鼓舞益奮賊攻益急至三晝夜賊焚
傷死者愈衆忽建泰與賊應西南城陷賊乃入羅俊
猶力守親擊一賊仆地扼賊之吭啃其面竟嚼一耳
血淋漓口角間大呼曰我乃明進士張羅俊汝等所
罵霸城者吾弟也賊擁衆亂刃死年五十一子仲庠

生適他出聞倡守來奔共禦賊城破卽投井死年二十六

居士曰公甫成進士卽以身殉爲諸義烈冠忠矣至孝於親友於兄弟與瞽婦相敬無違禮門以內何雍穆也丁丑公車與子論交侃侃多氣誼斯人也殆所稱完名全節之士乎

仇孝子雪廬傳

孝子諱雲慶字騰宇雪廬乃劉參議兌因君雪夜居廬題以贈君後人遂稱之爲雪廬先生者也君之始祖貴乙自揚州移新安遂家焉五傳爲鐸是爲君父

三賢文集

徵君卷之三

三

母邱氏以孝婦著聞載入邑乘君家貧事父母至孝人無間言父性嗜棗君每過輒懷歸以獻母氏年老多病君每夕焚香籲天願損己壽以益母母病尋愈鄉人稱爲孝子萬歷十九年辛卯父母各九十歲相繼終君痛幾死而復甦葬之日結草爲廬於墓側時沍寒雪深尺餘寢苦枕塊哭奠如禮負土築墳手植松栢足跡不入城市者三年墓之西北隅號曰鬼市與君之廬僅隔數武夜半悲風四集怪鳥弄舌野狐呈態甚至燐火往來於籬下君絕不爲動三年如一

日也縣令羅君啟先聞而高之親造其廬具文當事

得 旨旌表按君居廬時年近六旬矣禮稱不毀君不飲酒不茹葷不御內倍嚴於少年時夫人少則慕父母其中慕少艾慕妻子慕君不知幾奪其情孺慕之念雖有存焉者寡矣而君自首不移孺慕愈篤真可與歷山比隆陶彭澤傳天子孝諸侯王孝卿大夫上庶人孝各指其事歷歷無一非爲子之人則無時非爲子之事量有大小體有偏全孝之德則無貴賤一也君之廬居也親知有勸之者曰公無嗣且乏應門之童煢煢二女子何以爲情君曰我正以二親之肉未寒而恬然家居安妻妾之養此則情之所大不

三賢文集

徵君卷之三

三

堪也忍以此爲名乎故於遠邇騷客名公有贈詩百餘首君皆焚毀不欲示人然不求名而名益彰無間遠邇孰不知爲雪廬孝子哉君之被旌在萬歷乙未府道申請部院查覆君絕不與聞劉君兌仗士民公義而成其事嗣後巡撫王君紀月給米一石兵道解君經邦月給米四斗當不減劉殷七年之粟矣君溫雅平曠行不苟合言無夸矜無少長貴賤莫不驩然相得而孤介之性偏與淡泊爲親常連日不能舉火絕不向人道且無傾頰色其所自得深矣居庠數十年以色養二親不求仕進然善誘人從游者多所成

就復善書老而彌精七十生子九十見孫一日無疾而逝余垂髫知慕君長而猶及見君偉貌清言飲人以和飄飄然鷄羣之野鶴也邇以衰病棲遲渥水每過旌廬坊下恍見顏色於落月屋梁會其子爾顯姪孫憲稷暨其門人劉鳳年管從化過余請爲立傳余懼以言之不文有虧大雅君子之德又懼以言之不真失孝子本來面目筆不能下者久之嘗讀漢史舉孝廉無孝子傳蓋孝子不在家庭而在朝廷晉史傳孝子首李密東堂忿悃有遺議焉君廬居多瑞應余不欲以畸行先庸德獨此終身之慕真古曾閱一流

三賢文集

徵君卷之三

十四

人天心憐純孝俾父若母各永年得遂君菽水斑斕之願又以父母偕老於一時使孤兒無生死兩地之慮得一意舒昊天罔極之懷生事葬祭俱可無憾他人侍膝下日短或未識父母之面者視君之爲子何如耶當日講旌之牘曰新民以漁爲生事親之孝率多不知今借仇生爲儀型倡率之功是豈渺小余謂可以型新人便可以型天下型後禩他日或有良史如班馬輩爲明代立孝子傳者必首推君矣君生於嘉靖庚子卒於崇禎庚午壽九十三子一卽爾顯女一適花似錦亦以苦節聞

成夫人蔣氏傳

大名相國青壇成公清修雅望衣德象賢與其先公文穆光輔兩朝世濟厥美文穆公於黨禍方興時霜晶嶽立衆正歸依近代父子相業之盛未有與京者逢草野自廢息影深山心切識之庚戌夏相國函書致幣遣其仲子光不遠數百里過夏峯書曰某竊祿以來垂二十載雖身黜朝班時繫兼葭白露之思及歸里病困因循相慕殷而相遇實疎也匹荆之變歲在癸卯卽營窆竅敢借一言以資泉壤仲子復再致嚴命某慄然異之竊意相國起家詞林數典文衡同

三賢文集

徵君卷之三

十四

館及門操觚之士夫人可藉以不朽者當不乏人何乃授簡於山林野叟相國之雅尚誠遠矣某質訥無文不工爲調辭諛墓之請一皆謝屏今觀夫人壺德旣合彤管而揚芬闌幽以淑人心敦風俗斯固耄野之事也安可以衰廢辭謹按相國所撰夫人年譜姪蔣氏山東臨青州人肥鄉令宏宇公女孫文學揚廷公女夫人幼而失怙靜莊寡言笑戚黨徵其必貴年十六來歸事繼姑處妯娌克孝克諧文穆公官翰林清約諸子分爨計口授食不能供朝夕相國少病常臥山園及蕭寺中家事一切皆夫人屈勉取給承嘗

以有無分念相國嘗下第闕落卷不勝憤惋夫人曰
懲今之所以失知後之所以得何鬱鬱爲相國感奮
益肆力于學文穆公忤逆瑞罷官學使者瑞之黨也
相國欲避之不應試夫人曰避之則益疑奈何敬小
人疑相國從之已已隨文穆公京邸會京城被圍有
勸相國携夫人歸者夫人力言無舍父母係妻子理
相國嘆服得有同心也文穆公薨夫人居喪盡禮同
相國茹素三年辛巳歲大饑儲穀僅數十石悉出贍
族賑貧稱貸以糊口夫人躬甗糠粃茹野藪怡如也
癸未相國成進士居館職已丑伯子亮讀中秘書夫
三賢文集 徵君卷之三 五

人佐宦邸理家政訓子婦闡教肅然癸巳相國膺
特簡入政府中間晉秩加敘或聞示薄罰境遇不恒
風波險巇情事紛沓所以釋憂惶而計安全籌畫調
劑賴夫人不啻賢友丁酉秋闈仲子光文戰不捷夫
人頷之旣而闈禍作人服其先職也辛丑以今

上

龍飛恩晉一品封王寅冬相國感疾夫人亦久病強
起日夜扶持湯藥相國勞苦之欲少息夫人故示神
王不憚勞瘁而病益劇竟至不起癸卯六月望日日
中強起梳沐跌坐而逝夫人性勤儉器識過人當安
常無事拮据內政勞瘁閔皇及值大變決大疑能不

惑不激子女婚嫁不欲以錦綺失澹素風雖魚軒翟
覬纈榮貴盛未嘗輕剪一采服一綺麗也喜讀書通
大義至琴書繪繡各通其微然每每晦藏不以自見
也相國自爲諸生迄登揆席所遇升沉榮悴顛沛患
難夫人勸慰于道相勉以義隨在皆寓諒惻箴規之
言則相國之賢所以藉助於夫人者洵足紀也今觀
相國撰述夫人懿行疊疊數千言若有不能託諸臺
素者則夫人之賢彌可知矣易曰含章可貞以從王
事夫人有焉

三賢文集

徵君卷之三

五

湯母節烈傳

湯母睢州湯子斌之母也母嘗崇禎末年逆闖肆虐所至攻陷城邑母義不受辱罵賊死逾七年提學使李公震成徽守重建祠於睢州春秋致祭又十二年巡按御史李公粹然疏其事於

朝表其門曰生員湯祖契妻趙氏節烈之門子斌由翰林院檢討兵備潼關贈母恭人君子以有斌爲之子故稱曰湯母云母雖名族父聚所公尚敬邃學篤行與湯壘齋公游好時命式公祖契方幼輿論經義奇之遂許字焉母生而端淑有志操讀書通孝經及列

三賢文集

徵君卷之三

五

女傳年十三喪母褚哀毀備至十七歲歸命式公言動舉止皆準禮法壘齋公夙疾母治羹理藥惟謹病亟日不交睫者四十餘日及歿含殮皆身經理必誠必信親黨謂母嫻於禮湯固世胄後家漸落堂上甘旨之需嘗鬻簪飾市之值歲祲躬啣糠粃子斌見之戒勿聞大母恐損老懷也命式公性豁達喜賓客常儲美醞以待每出遊梁宋間數月不返母持家務嫻戚歲時問遺不廢素善病一室蕭寥見者難堪母獨怡然崇禎庚辰中州大亂李自成擁衆數十萬縱橫開歸間兼頻年荒旱饑民相率從賊母嘗對命式公

曰身爲婦人事有不測斷無苟全之理姑老子幼請
以一身謝夫子矣明年爲女治嫁斌年未弱冠亦爲
受室壬午三月賊潰西華先令斌從伯父賁皇公讀
書城北村舍倉卒聞變城閉不得入母向人曰遣之
意固有在來則俱死無益爲語吾兒善自立身勿忘
母平日言也未幾城陷遂整襟經於梁家人解之復
入井家人又出之母怒曰若教我偷生乎賊至而不
死非節也死不以時非義也於時賊已環至露刃相
向母厲聲罵賊遂見殺顏色不變賊嘆息羅拜時崇
禎十五年三月二十二日年三十七睢城殉義者鄉

三賢文集

徵君卷之三

六

紳則通政使李公夢辰閩閩獨母爲最烈比後遇忌
辰陰雲四合悲風夜鳴居人傳其期比寒食云

歲寒居士曰余來中州詢甲申大難事輒知母節烈
狀嗣兩河人往往稱孔伯君斌之賢則又知母能教
子而更著其節也孔伯自狀其母有曰斌初就外傳
歸必課所讀書一日偕同學出城外抵暮而歸母端
坐不食切責之曰汝年少志趨未定而樂嬉遊吾將
何望嗟乎湯母可謂教子明大義者也雖古斷杼愷
陰之訓何以加諸母生平大節於此徵之孔伯之學
漸於此基之矣歷稽往史獨怪史遷不爲列女立傳

而班固亦復畧之自漢建武以後范曄綜其成事搜次鮑宣妻以下若干人而晉唐宋元諸史皆效法焉若湯母者事舅姑以孝相夫子以義且成其子爲名儒復能致命於喪亂之日追媿前休不爲尤烈耶嗚呼此不惟可爲內則世之鬚眉男子自稱同學所遇稍殊輒爲改易者視此亦可以自勵矣

耿烈婦傳

烈婦王氏太康諸生耿於彝妻也壬午三月十八日闖賊圍太康城氏卽以死誓及城破囑子帝德曰我死必矣汝儻得存當讀書自立我死無恨賊至遂罵

三賢文集

徵君卷之三

七

賊求死賊首曰此貞婦也釋之氏乘間投井已折左股羣賊復撈出氏罵益厲賊因斷其舌絕其頸有老僕婦郭氏相從目詳其事氏死之四日子帝德往收其屍頸斷口邊血漬猶新顏色如生覆於淺土復有人移其屍於他所其家未知也忽白晝其姑白氏若氏憑之者爲言死時得快其志第骸骨暴露令深掩之驗之果然氏中書王永隆次女死年三十三歲

刺史念南王公傳

公諱介號念南初諱三錫字任軒曲周人父屏南公文學獨善性剛直不諧於俗其鄰居宦也垂涎公產

先以厚資餽族人以及屏南公屏南公堅弗售以是怒族人遂共羅織之屏南公得禍不懼卒全所居宅其他蕩然也時公甫數齡親當其阨誓取科第以慰屏南公父子俱無他技巧因貧窶特甚屏南公棄世而母氏獨存或曰止一舉火嗣又有欲得公宅者時雖貧賣居宅買田地猶可鄉間作富人親友亦有以此勸之者公曰吾棄產不能見先人於地下且命苟貧金入篋中一夫媵之走矣吾何有母氏亦成公志自失怙至登賢書十八年皆茹苦日也公性至孝不能具甘旨以和顏怡志悅親其不爲溝中之瘠者幸

三賢文集

徵君卷之三

六

耳戊午舉於鄉太夫人春秋高性嚴急當一言不合輒喝斥公從無幾微見於色時紳宦多鮮衣怒馬公獨十三年無帛衣布袍草履不識者不知爲孝廉也西鄰張老憐公清苦以鑲銀器一盒鄉間一小莊餽公公弗受蓋時之僅見者爲定與諭課士之暇一編自命著任軒隨筆課士終任未嘗一字干縣令直指吳公諱阿衡訪時政公以三策上首荐公俸甫三年遂有東平州之擢刺東平仍服學博公服補易白鵬帶以銀箔鍍之而已東平素號衝疲加以兵燹之後比屋流亡野多曠土徵收羨餘卽庸補正項聽訟款

言化導從無金矢之入士民相安有來暮謠當道不
惟不以責交際反有止用東平水一盃之語時天下
多故提糧檄如雨下而公病矣投劾而歸歸則家猶
徙四壁立也常謂人曰吾生平無快事惟守產不愧
先人居官不負科目差足自慰耳未半歲而卒年六
十一從祀鄉賢三子體元體健體行俱諸生五孫三
諸生端方郅兩進士鄰郎承先啓後以文世其家者
仲子也

歲寒居士曰念南公司鐸范陽嘗於鹿伯順座上

習其風古刺史東平借鹿太公走孔林復過署中

三賢文集 後君卷之三 九

信宿迄今四十餘年矣廣生訪余蘇門執費而修

舊好且欽四文益兩嗣君連步南宮凜凜守先世

清白迺後人儉素學莫切於是亦莫大於是因念

公厚德發祥而余叨夙緣雅誼難忘舊好遂爲之

傳

碑銘表狀

明故督師閣部太傅謚文正愷陽孫公墓誌銘

從古英雄豪傑以得時遇主功成身退爲顯名爲厚

寶爲承天之脊而阨塞艱苦俾以重任而多方掣肘

使不得盡其才且危其身此其心更苦而天之所以

成之者乃別有在天生武侯於漢末所志未遂鞠躬盡瘁死而後已人謂天之阨武侯予謂天之通武侯使之重於天下萬世也請以擬孫公按公諱承宗字稚繩別號愷陽其先河南湯陰人高祖諱遇承樂聞來高陽遇生懷懷生遠達生麟是爲公父母張氏三代皆以公貴贈一品妣皆贈一品夫人麟生四子叔子敬宗仕兵部職方司員外郎公爲季嘉靖四十三年正月壬申生六歲能對聯語便驚人十六補博士弟子員文宗署其牘云古誼敦靈如龜鑑忠肝堅信若鐵石明年娶王氏夫人以第二人食餼三十一歲

王賢文集

徵君卷之三

三

選頁第五明年甲午中鄉試爲第五爲舉子時仗劍游塞下周歷亭障旣築訪問故將老兵遂通知邊事已亥讀書雲中撫署兵蹂躪撫軍鼓聲如雷公教令吏書榜示曰向某道領餉譁者斬人服其贍畧自甲午至甲辰十年讀書一甲第二除翰林院編修又十年甲寅陞右春坊右中允是年東事起襲撫順清河大兵四路進討王師敗績朝議倚舊道撫熊廷弼足以及辨此公曰未也當大事須置身事外乃能洞悉情勢今身爲邊事所困曾暇及藩籬之外乎舉朝皆視歸乎公庚申陞左春坊左庶子兼翰林院侍讀充日

講官東事急兵部尚書崔景榮數爲言官所詢言請
罷景榮以公代要公於會極門相率下拜公力辭竟
推兵部添設侍郎以主東事壬戌廣寧不守王化貞
走熊廷弼焚棄右屯以西四百里躡化貞後相將入
關乃拜公兵部尚書兼東閣大學士公上日前切要
及積習夙病數十事請寘熊王於法兵侍王在晉代
熊廷弼經畧遼東請築重關於山海關外八里舖費
一百二十萬公謂首揆葉向高曰某當親往一察情
形公至與在晉往復商確曰皇上倚豪傑爲萬里長
城安得以百萬金錢輕擲於無用之版築本兵王象

三賢文集

徵君卷之三

王

守未央閭鳴秦主覺華袁崇煥主寧遠在晉堅持主
守中前公登中前城遙見寧前形勢天設重關以護
神京覺華島孤峙海中與寧遠如左右掖可扼敵之
用水且得展我之用水遂決計定守焉且驅西兵於
二百里外漸遠於關城公歸以關門形勢諸當行當
罷事宜入告上欲易在晉而未得代之者公亦難其
人遂自請督師辟職方主事鹿善繼以行到卽定兵
制修營房教火器處分逃將以新闢鎮之耳目禁絕
饋遺宴會省叅謁使專一公事如有所欲言則去時

叩門弗拘嘗格令趙率教守前屯關外出守始此以
馬世龍佩平遠將軍印行授鉞之禮前屯旣復撥馬
烽火直抵寧遠立六館招天下豪傑上遣官齎白金
蟒衣賚公出內帑十萬犒將士公執奏中使關涉兵
政自古有戒上溫旨報公是時逆奄方用事劄內操
所遣皆中官提督已萬觀軍容使之意故公抗章逆
折之遣魯之甲出守中後所王楹出守中右所皆出
上所賚蟒紵白金甲馬弓矢親酬而餞之檄祖大壽
移覺華自八里舖至寧遠收復已二百七十里以袁
崇煥與中軍滿桂經營寧遠造車兵營爲恢全遠之

三賢文集

徵君卷之三

三

計公語世龍等曰守與恢復終是一事但靜則爲守
動則爲恢復予言守者也予懼不能守者也今日守
關門必不能不堅守前屯守前屯必不可不堅守寧
遠守寧遠易於守前屯有覺華可倚連山可扼諸山
可伏目前緊要惟有訓練精明賞罰當可而已夫兵
以簡汰而精亦訓練之一事也公當關久外警漸息
朝議遂起謂公用關撫衛撫暨大將爲不得人公力
請去不允後上疏云上如不欲臣竟致其事則合臣
始還闕下以聯絡邊情比於識道之老馬上必不欲
臣離關請不推經畧不推總督惟以臣一人督兩撫

邊事不治則治臣之罪奏入台省爭言總督不可罷
推吳用先朝議則明尼公矣公銳意有爲恐事從中
阻因西巡薊昌閩喜峯古北諸口取道入都賀萬壽
節而奏進兵機宜南樂急告逆奄樞輔擁兵數萬來
清君側奄悖甚繞御床而哭上趨內閣擬諭曰無旨
擅離信地非祖宗法度所宥公已抵通接諭卽刻東
行閉門求去南樂喉其黨崔呈秀等首疏頌魏璫而
劾公科臣郭興治和之遂下九卿雜議公自此不得
有爲雖留而實困也及公告歸或曰非殺敵不可歸
公曰殺敵不難也只中朝不肯耳謝事之后遺奄復

三賢文集

徵君卷之三

重

使其黨梁夢環磨治督府文書錢物毛舉髮櫛一無
所得而止公當關四年復九大城四十五堡招練精
兵十一萬進軍四百里敵退七百里招集遼人四十
餘萬遼兵三萬兩年屯田五千頃四載督師經費財
一百三十餘萬諸罷兩尙書築城撫賞之費百八十
萬而有餘也公嚴於持己恕於御物激勸忠義鼓舞
豪傑權使貪詐籠挫宿猾至誠側怛而機牙四應公
旣歸里袁崇煥滿桂寧遠之捷一一皆公所布署已
已之變公朝受詔夕引道上召見平臺細詢方畧初
十公守京城夜半旨出令守通二十四騎出東便門

茅元儀與俱時有以歛爲言者公曰僕受命爲勦不受命爲撫急簡騎兵三千遣游擊尤岱將之馳赴都城敵退入南海子老營諜知爲公所遣感咋指馬上命滿桂爲武經畧總理援兵出馬世龍於獄賜之金鉏公下教兩帥要如兄弟共成大功忽有遼兵東潰之變袁崇煥下詔獄祖大壽感其私恩與其中軍何可綱等率所部萬五千人東奔公密奏曰大壽危疑旣甚又不肯受滿桂節制一軍驚駭激而東潰非諸將卒盡欲叛也當慰諭將領解散士卒大開生路以收衆心遼將大半爲世龍部曲臣謹遵便宜行事之

三賢文集

徵君卷之三

五

首密調世龍往撫公又密劄諭大壽教以急上疏自列東兵殺敵以報浩蕩之恩以贖督師之罪仍許代爲別白大壽得諭大哭諸將亦哭具如公指還報公急遣世龍報命發步騎兵一萬五千令督以入援而京師解嚴上遂命公移鎮關門大壽等整兵入關當是時敵據四城其勁在永其次在遵而以灤遷爲羽翼公議先趨灤州四日而西城皆下公度敵人瀕去必一犯遼以示強遣孟道等馳往錦州備之我兵未解甲果與敵遇復大捷計公督兵戰守七閱月復諸邊堡四十有奇先後上首級九千餘顆露布奏聞上

親告廟布告中外加公大傅蔭一子錦衣世襲未幾
言官欲追論大壽東潰之事公密奏曰敵纔出口遽
抹殺殊死血戰之功何以服諸將之心乎自是而中
朝之議又紛矣公十一疏乞休上命各臣議去留皆
不敢堅夾上曰吾固知無可代承宗者時遣內閣中
書宣諭視事公奏謝曰臣於某日視事食少事煩卽
不能久而興疾討賊當可爲法遂出關抵松錦逐城
爲飭備條次東西邊政分八疏入奏陵城失守閣部
中軍副總兵何可綱以文自祭死之夫失一陵城而
得一節義士以撐拄世維見公能得人之死力然以

三賢文集

徵君卷之三

五

成敗論人者則百計中公矣公以十七疏求罷得閒
住公之初督師也臨遣隆重付以兵要雖宵小竊枋
讒間百出猶得以恩禮進退隱然係官府之重其再
出也受命艱危之際夜半出片紙單車橫穿敵壘奏
汎掃之績是役也危莫危於東便門之一出急莫急
於東師之一潰其所以危而獲安急而旋定者公以
身造命真可挽未定之天矣公賜閒里居時流賊數
十萬曾未一大期而強欲勸之就撫公謂當以有名
兵將莫用督撫節制日日尋賊廝殺賊急求活乃可
乘機爲撫撫須另一等人專主撫事不得借言勦妨

其撫公心一日不忘安撫云戊寅敵復南下公部署
子姓分雉堞距守而不餉之兵不餽之城不墜之衆
心不能張空拳以禦強敵城破衆扶至城南三里圍
頭橋老營勸之降公罵不絕口欲求速死兵不忍殺
公乃自理繩命兩兵加勒而死是爲戊寅冬十一月
十日距其生得年七十有六公配王贈一品夫人生
七子長子銓以選貢任高苑知縣銓子之澇錦衣衛
指揮僉事皆守官不與難三子銓先公歿從公死義
者次子舉人鈐四子廩生鎔五子尙寶司丞鎰六子
官生鈿七子生員鎬鈐子之流之澇鈐子之澇鎰子

三賢文集

徵君卷之三

五

之浩鎰子之澇皆力戰罵敵以死其餘從子孫暨婦
女童稚爭先就義者二十餘人公善知人雖悍瑤驕
將莫不解頤俯首然公才大而不能不露時作快意
之語故人多忌之公雖不善爲人知然海內賢豪如
馮從吾周汝登鍾羽正於公初請行邊之日特爲勗
勉高攀龍左光斗輩嘗特薦於朝又何敢爲不知者
詬厲也武侯伐魏中外協心黃皓尙未敢伸咏然祁
山六出不能得魏之尺寸而五丈原告殞蓋天之所
興人不得而廢之徒以鞠躬盡瘁一念血誠昭揭於
天下萬世公之所值其敵人之強衆口之讒有難於

武侯者而鞠躬盡瘁不減於武侯天正以厄公於一時者通公於天下萬世也公有文集一百卷奏議三十卷兵火之后茅元儀得之頽垣敗屋中南樞范景文刻而傳之別有督師全書一百卷督師事宜八十卷車營百八扣一卷歷官舊紀四卷撫夷志十卷高陽縣志十四卷前督師紀畧十六卷後督師紀畧十卷定興鹿善繼所輯公澗二十四年矣志墓之文未有所屬公仲孫之濛以予知公深必欲俾予撰次以傳信異日予固不敢辭且感公序余家乘之言曰尹

吉甫佐周宣中興歸而飲御乃在張仲孝友噫味斯

三賢文集

徵君卷之三

七

言也又何忍辭文正之謚甲申弘光朝以御史王孫蕃請也七十八歲病骨稍蘇於辛丑人日捉筆逾元宵稿成是爲銘 銘曰於維閣部一代偉人胸藏萬象廣大無隣文心亶亶靡堅弗摧億萬斯言和者其誰兩次當關敵弗敢入危而復安仆而復立元臣殉義視死如歸臣忠子孝形慘音徽總由知學見道分明毀譽不搖得失不驚予也腐儒公實攜之張仲孝友有感於詩功垂今古德配地天千百年後雲旌月娟當與公之子孫世世共守斯阡

都公諱任字季樂號弘若先世自晉徙大梁爲祥符
縣人曾大父諱臣大父諱文奎甲辰進士鎮江府知
府父諱維新甲子舉人大同府通判自臣下至維新
二世以公貴皆贈山西布政司叅議祖母龐母翁俱
贈淑人公以萬歷癸丑進士授南京兵部武庫司主
事遷本部郎中出爲山西太原府知府遷本省按察
司副使不阿上官去官林居者一年丙寅起汪西南
瑞道遷井陘道歷陝西按察使右布政使郵符事不
協新例鐫級壬申補山東督糧道遷本省按察使失
直指意坐計典罷職甲戌起陝西神木道公具疏自

三賢文集

徵君卷之三

七

陳屢經計處之由力辭不許遷山西按察使復守正
不阿失直指意罷職林居者四年當是時逆闖李自
成鯨奔豕突秦晉間攻破諸州縣朝議擇素有才望
者急補邊缺至是復有神木之命未幾寇焰愈熾延
綏巡撫某以榆林重鎮特疏調公癸未補榆林道叅
政至未數月賊陷西安全秦郡衛皆風靡獨榆林不
下十一月十六日賊發牌約降公公碎其牌斬來使
當是時撫軍總鎮皆託故去官公獨與署鎮某厲器
械嚴飭捍禦爲死守未幾賊勢益衆城旦暮且下署
鎮知不守乃夜脫身率數十騎護妻子亡榆林世將

家固多壯士公乃盡出囊橐所有壯士慷慨登埤誓死與城存亡衆皆感泣下憤裂向義奉公約束憑城殺賊萬餘級賊益憤急攻城城破公率壯士巷戰連日夜復殺賊數千級巷血爲渠壯士多戰死公被執賊猶以禮遇公公罵益烈遂被害蓋癸未十一月二十三日也賊自二十二日圍城下相距已七日賊皆義之其司武庫時承平日久兵器久歸蘭鈞好事者動公曰若借稽察爲名則獲資無算公曰當聖明耀德之時不宜多事武庫願客勿言客慚退在太原稅糧規例州縣解如府收支一出太守歲贏資嘗數三賢文集 徵君卷之三 五

萬會前守有故暫議郡丞代收公至遂借此具詳各院稅糧收支專責郡丞爲定例太原固多屬邑一時皆震懼砥礪晉富民橫恣蹂躪里閭問吏縱問公皆羅置法豪強因是屏息又創誠正書院以造就多士故公守晉三年而文教之興爲蒸蒸焉官晉臬時方申頌藩國規儀先是晉藩權闖某煽橫至是輒欲假名目箝制監司守令時監司官多屈曲與往來公獨否闖方恚之會規儀朔望監司官當入朝王藩闖約公往朝公不往藩闖皆難之或勸公曰闖且以違朝廷制構公奈何公曰按察司者正以執朝廷法明肅

綱紀東府有諸不法事司且得問故不令與都布二
司同朝祖宗之制也揭會典示之卒不徃闔竟憚公
無所構巡按御史某構學使袁公同官不敢一顧袁
公公獨時時過袁公與周旋袁公赴部鞠資無資公
悉囊中裝得三百金遺之不以告人卒以此怒御史
公性廉直而尤長於政事所至梳垢爬搔民獲蘇息
然耻爲徑實終身不苟阿權貴人不通藉三十年而
官不至於陪卿慷慨狗義視死如歸嗚呼亦烈矣哉
公生於萬歷庚辰十一月十五日戌時卒於崇禎癸
未十一月二十八日辰時元配李氏累封淑人賢明
三賢文集

徵君卷之三

三

知大義以勤儉佐叅政公者三十年迄公殉難淑人
課子若孫勉承先志越十有八年庚子九月二日卒
生子一元祺選貢生女七長適曹兆龍次適閻和胤
次適程名俱茂才次適李光座雲南按察司副使次
適張鵬舉次適孟瓘次適倪樂堯俱茂才孫男一
甫順治戊戌進士孫女二長適紀弘謨順天府經歷
次適曹廉善茂才始公之殉難榆林也冢君元祺倉
卒護喪歸避難河朔遂權厝陽武縣今淑人以庚子
九月卒於舍卜新阡於會城之南柳林將以月日啟
公柩合葬焉冢孫甫奉父命持太原傅山爲公傳以

幽宮之石請銘於予嗟乎未申聞逆闖亂秦晉榆林
寧武堅守捍賊之以義死者予得二人焉公與寧武
周遇吉予固知公真賢者也嘗錄其榆林死事始末
入甲中大難錄已復論次公前後立朝大節入中州
人物考今其葬也非予誰銘 銘曰天挺篤生疆場
用憂成仁止義孰怨以尤予銘幽室用俟千秋

前光祿寺少卿張公暨元配宜人趙氏合葬墓

誌銘

崇禎十七年三月十九日逆賊李自成陷京師保定
張公羅彥以光祿少卿家居同兄觀政進士羅俊率
三賢文集 徵君卷之三 五

合郡官紳士民倡義死守越六日保定陷公死之兄
弟子姪暨婦女一時殉難者二十有三人詳公弟羅
喆閣門殉難錄中後二十餘年丁未公元配趙宜人
卽世又二年己酉公冢孫秉曜乃寓書函幣介魏子
一鰲鹿子洗心乞言以銘墓石噫公大義昭天壤炳
日星又何借草野耄廢之言獨是逆闖以賊逼帝創
從前未有之變局神京旣陷保定抗守留千古不易
之綱常流連痛恨有不能自己者先是自成陷全陝
文武守土者皆望風逃遁或紳士爭爲亂首相與稱
仁誦義降附之恐後公每痛心切齒欲以死殉至甲

申春太原寧武陷自成入居庸其黨劉宗亮等畧畿南諸郡期北會犯都城中外震驚無人敢言拒賊者公與觀政公計曰保定爲神京捍衛不可不守巡遠之事豈異人任乎况郡守未至我等不任其責奈天子何於是約同署印同知邵公宗玄糾合郡官紳士民北望拜闕歆盟於北城之上激以忠義捐以私橐人咸感憤先壅兩門示必死守二月真定兵叛殺撫臣迎賊賊僞牌數至惟誓死守之嗣新任知府何公復總監方正化亦至未幾李建泰以閹宦統禁兵遇賊退入保定實以城爲贄而人不知也賊進攻公奮

三賢文集

徵君卷之三

三

力拒擊賊敗却三月復轉攻建泰沮鄉兵燃礮者邵以死爭不能得賊屢至城下叱張吏部名大罵復射書勸降傳都城已陷公慟曰吾誓不與賊俱生矣倘能保此一郡猶可待四方之共誅逆賊者賊攻西北益急礮矢如雨公身當其衝盡傾家貲以犒士莫不感激爭死賊勢小却賊首劉宗亮乃自殺其偽將數人尅期克城建泰中軍郭中杰李勇復爲內應乘火倡亂賊遂入公急歸取鏡書面上一忠字題壁曰光祿寺少卿張羅彥義不受辱縊死井亭越三日無敢殮者三犬護屍賊見之凜凜不敢逼視有一犬噬毗

足賊絕其毋賊錯愕借藁瘞之又三十五日賊敗旣
遁家人始啟具棺殮面色猶如生云公諱羅彥字仲
美號二酉先世小興州人明文皇帝內徙始祖仲禮
隸保定之清苑二傳至綱景帝北狩以書生請纓有
功封侯戶爵不受又三傳四教郡庠生生純臣由武
進士官驃騎將軍前軍都督府僉事是爲公父生六
子長羅俊崇禎癸未進士卽觀政公端毅有清節同
殉難公其仲也公爲人爽朗孤峻耻濫交無文章友
喜談論善謹說天下事隨意出之輒條理而文卽謹
語必中肯綮天啟辛酉舉於鄉崇禎戊辰第進士授

三賢文集

徵君卷之三

三

行人册封襄藩歷陞吏部稽勲考功文選主選事有
直聲時徑途猥雜銓法大壞公疏通裁剔事無遺滯
待羣吏嚴明無敢欺謁選人稱慶武陵在政府借起
用邊材引置壬人公力駁正人皆憚之公姻某者資
俸應出守餽貂裘兼金求善地公峻却之時厥衛緝
伺益蜜邇卒布滿吏部公庭銓司屢下獄抵罪時人
目爲火宰公獨厲廉能竟無纖瑕可中陞光祿少卿
上郊祀公贊裸獻先主選時庚辰進士謁選有直奔
堂上奪籤筒自擇者公糾劾有詔重處其同榜臺省
卿之會京察降公一級調外用里居奉母盡懽凡事

必資其兄之命友愛諸弟無纖微憾勇於任事禍福利害不能惑亦不怵也遇有司苛政必面折庭爭力爲窮民請命有爲僧營寺觀置地窟隧道作懸藪公著說遷之保定知府方一藻以守城稱首功遇媒孽將至獲罪同鄉御史史堇主之公憤甚率百姓擊登聞鼓上書訟其寃由是與堇不合後成德劾溫體仁史堇詞連同鄉獨不及公益信之有素耳先是十五年間以城守功詔賜敘資戒嚴時給事中時敏奉勅至夜半呼門公不敢敏怒劾公擅司城鑰公引郅憚事辯之詔勿問公故將家子少從都督公居塞上

三賢文集

徵君卷之三

孟

習於戎事常出與諸將分曹較射故林居數遇城守嫻習其事入皆樂附而爲之用公之生平所以與城爲終始也謂非天之屬意於公乎公之生距殉義時年四十有八元配趙庠生趙公應乾女封宜人端莊慈敏不苟言笑孝舅姑和妯娌公性剛而惡惡嚴宜人濟以和順偶怒不釋至長跪以請必得霽乃已都督公卒於官家遂落公兄弟六人皆嗜學不事生產宜人以勤儉佐之迄公舉於鄉宜人以母老家貧勸之學語次涕零公輒肅起以謝成進士恩銓曹卿貳所至皆寓相濟意教子慈不廢勞御賤妾嚴不廢情

門以內讒譖不行職事不相擾雍雍如也光祿公罷
官歸宜人謂曰直道不容今如此猶幸矣當公屢倡
賊守時宜人輒出冠帔簪珥犒士曰此朝廷所賜當
爲朝廷用之甲申倡守宜人率諸婦女於後園井亭
誓死以待時秉曜尙幼託老嫗攜匿之城陷公就縊
題壁有妻趙氏妾宋氏錢氏俱投井死之語宜人請
曰妾忝誥封願與君同縊乃結雙纒於梁請先引纒
以鳴志纒絕傷股墮二齒及少甦公氣已絕矣匍匐
至井知兩妾子婦悉歸正命復躍入逾一晝夜不沉
詰旦家人聞井中有聲乃宜人也出之復索刀欲自
三賢文集

徵君卷之三

五

到家人勸之不得復以首倒擲井中旋浮於水上兩
手持磚強以水押滿口中又不死如是者更兩晝夜
時有安定宇至井亭見之泣下曰光祿公閤門俱死
宜人纒不能死井不能死者此天欲以孤付宜人也
倘必死五歲孤焉能存乎宜人乃挽索出井匿草屋
中賊黨大索張氏子姓敢匿者死舊僕掖宜人出城
密探秉曜存亡數日尋至同亡入山中賊遁復故居
啟諸屍棺殮悉一身拮据諸昆弟孤幼婚嫁之需宜
人猶量力以給躬勤績紡不替至撫秉曜成立唯以
修身立行無墮祖父之志爲期勉嗚乎宜人可謂爲

其難矣康熙六年十月十八日卒距生得年六十有
八子晉增廣生城陷投街井死二十六歲娶翰林院
簡討師公雅助女先宜人死於圍井女一適崑山縣
知縣師人門早卒孫男一卽秉曜娶廩膳生杜芝女
曾孫二衣千曾孫女一俱幼嗚乎人臣死君難天地
之大義也而公以林居之人不假一兵一餉能以危
城抗兇鋒於國勢旣去之後且肘腋背主奸人督重
師而欲賣孤城尙能以六日繫九鼎之重闔門慷慨
臣死忠子死孝婦死節純忠大義豈可與畢命一朝
者同日語耶宜人雖不得同殉而幾求死不得卒能
三賢文集 徵君卷之二 吳

保其孤以有成秉曜承忠孝之裔當艱貞之會定有
以自命矣袁筆敘其事復系以銘

銘曰達人秉時蠖屈期伸乃反經濟節義蒙屯咄咄
若天之艱其遇實則生氣迎其辰愴懷往事痛念甲
申經過上谷憶光祿而沾巾普天同仇胡皆講義而
稱仁高牙大纛承簡命監降旗競望先塵公林居偁
大義兄弟父子若一人大厦頽分支一木六日存兮
繫千鈞晒彼常山兮再見真杲媿美睢陽兮不獨一
巡寒逆膽褫奸魄騎箕尾馭髯鱗皎皎屋梁明月巍
巍高塚秋旻猗宜人之懿範惟刑于之以身矢百死

而不易圖黍稷之明禋告彼山谷兮安宅是窳廟彼
頑鄙兮碧血常新嗚呼是有明鼎革倡義殉節之臣
封文林郎藍田縣知縣懷秋楊公暨配劉孺人

合葬墓誌銘

文林郎楊公以順治十三年五月十五日卒於震又
三年配孺人劉氏繼卒先藍田君匍匐千里來夏峯
乞銘其父未搆管及是合葬復以母狀來憶居渥城
拉齒相雁行數人爲耆逸社實首推公余心儀久矣
烏敢辭按狀公諱洪警字懷秋其先小興州人明初
徙居新安之凍城村五世祖立陝西叅政有宦績二
三賢文集

微君卷之三

七

傳循禮兩令單縣臨穎再傳世爵以幹才尉長清建
祠志去思具載邑乘是爲公祖父桂年十六舉茂才
識者目爲偉器無何以病逝公三歲失怙伶仃孤苦
母劉攜哺外祖家後就學岳氏且耕且讀公雖起阨
窮慷慨有大志斬截自立耻爲世俗夸毗或遇鄉里
不平奮袂排解豪強聞履聲輒避去公既用義槩著
賢序頑獨念母氏冰心孀節歷年六十未沾天褒每
索居淚泫泫下會邑紳士具陳當事得蒙旌表公稍
用發抒又母族姊夫亡無子矢志從一後漸迫饑寒
慨然曰安忍使孀節至此且母志謂何抑微獨公也

配孺人體姑志同公奉迎扶持終其身復以禮殯殮
盡一時旁觀嘖嘖謂公夫婦唱隨大義不第尋常居
室事是難能耳他至營中表李之葬至再郤諸坐某
居間之金義形詞已世傳有奇方施藥以起病者全
活甚衆問或持果餌爲酌則扃戶不顧也太約公與
孺人以勤儉持家以慈悲濟物約其腹爲德不一而
足槩如此云嘗一視子官舍時大盜盤據脅從甚苦
公見諸獄纍纍則函燭若曹誰非赤子泥成案聽羅
織生全有幾古有閔刑書閣筆不下彼何人哉蓋藍
田之政獄無冤民公之教也旋歸里蕭然寒儉不異
三賢文集 微君卷之三 庚

貧舍公故有夙恙動履出入必杖然神明不衰迨屬
續從容如平時非神之素定能耶孺人邑庠劉好德
女婉變性成事上接下一本誠篤雅與公合志奉婦
姑無論浣滌潔膳姑重髦同榻扶掖幾二十年以故
於姑族姊同公敬禮無怠則誠孝所蓄積者素也養
孺女訓以先姑守節事姑有表姪孤女方三歲撫養
婚嫁無異已出人情愛所出固耳姑之子息則有間
姑之中表姪孤孫女尤有間孺人慈悲之稱於是遍
閩里他口碑無論里有悍婦孺人以德撫慰感激無
他至欲火其仇之廬念與孺人進舍而止後自吐實

古稱格豚魚尙屬無情物耳不知視此婦何似公得
壽七十有五孺人得壽八十有一子一行健卽藍田
君順治己丑進士授陝西西安府藍田縣知縣孫男
三爾嘉廩生爾淑廩生康熙丙辰進士授翰林院庶
吉士爾修幼未聘其姻譜俱詳誌石

銘曰風澆俗僞返樸守貞猗歟公只質直而淳母堅
剛節子成閩人且爲善如渴厥儷維均備天道之或
爽何葉奕之振振雖恩綸已煥而羊腸世路知養親
志者不於官政於子之身涑城新壠盡彼磷岫我銘
立室使過者有考於貞珉

三賢文集

徵君卷之三

五

貞毫君陳氏墓誌銘

往聞陶母范母蓋古所稱賢達而有高識者也然一
成其子以功名一成其子以名節得之婦人誠難更
有非功名非名節而沉靜深遠莫測其意不驚其神
爲女史所未經聞未經見者則貞毫君是己貞毫君
太原傳道人山母也姓陳氏父諱勗忻州諸生母周
二十二歲勵柏舟操十七歲歸於擅孟先生爲傅氏
婦舅叅議公御家頗嚴諸婦中陳獨以勤慎著生子
三長庚諸生先卒矣卽山甲申後以道人稱三止舊
太學生當甲申之變山棄家而旅隨所寓奉母往母

絕不以舊業介意念沙蓬苦甚怡然安之迄歲之甲
午山以飛語下獄禍且不測從山遊者僉議申救貞
毫君要衆語之云道人兒自然富有今日事卽死亦
分不必救也但吾兒止有一子眉若果相念眉得不
死以存傅氏之祀足矣逾年飛語白山出獄見母母
不甚悲亦不甚喜頷之而已嗚呼此母之達識如何
也謂道人兒死亦分見死非不得其死也旣非不得
其死死復何恨不死而生生亦何疚其不甚悲不甚
喜摠之死生不驚其神絕不作世俗兒女之態覺陶
母成子以功名范母成子以名節何如貞毫君相忘
三賢文集

徵君卷之三

早

於無言乎貞毫君內美純備皆婦道之常不能詳述
述此一端亦可告後世矣生於萬曆丁丑十月十七
日壽至八十四歲之庚子十一月二十八日卒於松
莊之僑舍山轉徙無常家庚子適在松莊貞毫君山
之友蹟其行與年私稱之者也三子各有子庚子長
襄爲諸生二十歲亡婦李同日仰藥殉次子仁山之
子眉止之子普景永永出嗣州守房再從伯父周仁
有子醴眉有子蓮甦赤驥貞毫君已有六孫三曾孫
二孫女六曾孫女亦有婚嫁今之不知山者皆指爲
輕世肆志之人不知山得爲輕世肆志者蓋有老母

之賢許爲之也嗚呼山之所痛心者尤當深隱其辭予雖知之恨衰陋不足以傳百世而下貞菴君之能傳者不獨以其子也系之銘銘曰貞菴君道人兒兩相信忘險夷何所喜何所悲冠而弁人所嫌弁而冠我所師嗚呼後有信史其亦有考於斯

司禮監高公神道碑

甲申三月逆闖陷京城先帝怒起推案先殺公主命國母投繯遂自縊萬歲山時大臣殉義者自范內閣倪司農而下二十餘人勲臣戚臣殉義者張惠安劉新樂鞏都尉而下不及十人武臣殉義者賀副將高三賢文集

徵君卷之三

聖

指揮而下僅七八人而內臣殉義者王督剿高司禮而下則不下二十餘人然督剿六軍總帥國之存亡君之生死繫焉司禮則垂老閑居不與聞國政者也獨能裂裂與名下十人同焚死真可謂純忠大義也哉按公初名昇號雲峯順天府永清縣信安鎮人父志公生於隆慶己巳十二月十二日年十五選入內廷隸大司禮張公誠讀書博覽遇事明決拔內書堂歷南司暨皇史宬提督光宗御極擢東宮紀事憲宗御極命掌內官監印務因侍上讀大學在明明德賜名時朝居恒以成就君德自任時講官孫承宗謂公

及秉筆王公名安者曰民間家塾講習朝夕聚首促膝相習而熟今上御經筵恭默無一問難臣下日踞階而退何由熟也常朝奏事例有口答今借此義與公等約上問某句講官通俗細解啓發問難俾上通曉機務與臣下日親日熟此啓沃之要也公善之曰非復午講不可王公謂當請修九五齋公曰孫君欲致君堯舜須有茅茨土階遺意何必修齋而後講乎公夜直宿御榻旁孳孳爲聖學計因見同朝有播飢政事羅織縉紳者公自揣難容遂連章求退杜門謝客未幾王公果以譖殺矣迨先帝入繼大統三召就三賢文集

徵君卷之三

聖

督公再四懇辭未蒙俞允惟受司禮事公善書上命題乾清宮扁額公顏以敬天法祖四字又書人心惟危道心惟微惟精惟一允執厥中上御筆以忠純二字旌之賜以圖篆一日御批令票擬章奏公俯伏奏曰天下大事閭臣五六員尚不能辦臣備員內廷卽有才而票擬之權豈可假內官之手况無才耶且旨從中出恐萬世之後有累聖德上弗聽令出公竟日不食上爲感悟召令毀批公奏曰此是皇上御批臣安敢毀上將票自焚冬至上祀天於南郊御馬監奏

請皇上閱駕試馬及走解等劇上問公馬可看否公
奏不可且引經以爭上叱曰偏是你有這些語說各
官退食公獨俯愆外不敢輕動少頃聖怒霽起簾指
曰你如何不去喫飯公俯伏曰臣庸愚冒犯天威該
死何敢食上喜曰爾所奏誠是勿自苦公謝恩始退
已已因病乞休家居靜攝與諸門下後進日談忠孝
廉節自範範人言行毫無所苟逆賊蕩都城上傳命
內臣凡在籍在朝悉登埠防守公名下褚憲意擊賊
爲礮所震城陷公先一日令人備棺於東堂至日正
衣冠拜天辭闕大書字於堂壁曰司禮監掌印太監
三賢文集

徵君卷之三

望

高時明率名下李繼善等合門死節三月十九日辰
時書書畢卧棺中名下輩環跪泣留公厲聲叱之隨
令蓋棺且曰一蓋棺吾卽歸矣於是闔之名下李繼
善賈爨倫馬文科郝純仁馬鯨徐養民宋輔震弻行
素李廷弼王家棟十人俱縊死舉火焚堂棺屍俱爲
灰燼又有名下方正化是時摠監保定奉公遺囑拒
賊衆寡不敵死之合格司禮共十二人噫亦烈矣予
嘗讀史傳至漢之呂強唐之張承業未嘗不咨嗟嘆
賞其人以爲士大夫之所難今公之烈烈而死也則
益難矣十二人俱從公烈烈而死也則益難之難矣

嗟乎三百年祖功宗德使大臣勲成武臣節殺身成
仁亦如此合十二人以成仁仁更皎然矣舍生取義
亦如此合十二人以取義義更截然矣此誠當代
鮮與之比卽古昔實罕其儔真可以愧天下後世爲
臣而懷二心者公壽七十六逆闖遁後公名下魏國
徵等捨骸骨於灰燼中葬之西直門外離城七十里
許南安河九壠山佳城而山西監視牛文炳乃公名
下中之趨楚悉稔公之行實徵言於予而鑿石於公
墓予首肯或謂予曰張茂則宋元祐間宦官之賢者
也借程正叔一顧而不可得子爲之表墓不亦甚乎
三賢文集 徵君卷之三 四

予曰凡爲臣子官有內外義無偏全忠君一念摠以
淋漓足色爲極諸公之合門殉義得之於內臣中更
爲奇絕正叔而在當亟榭管以揚休美余衰年軟筆
愧不能傳公以副牛公之意烏忍辭公有侄顯光等
九人孫璟等十一人多有聲於庠序者行將昌其世
以彰公殉義之德予特撮公之大節表而出之如此
云

題餓夫墓石

餓夫彭姓名之燦蠡縣諸生也父孝廉掄生其季子
甲申後攜妻子寓饒陽爲人作塾師未幾妻子相繼

喪生來蘇門依予然性不諧俗愛靜坐有人延於家
以市囂輒避去嘗渡河南遊韓子鼎業爲館之僧舍
年餘又棄去獨擔笠瓢書卷徧遊嵩少王屋諸名勝
或南或北皆以予爲家耻食嗟來在九山曾絕粒數
日予挽而之夏峯勸之歸老先人墓傍生曰某出門
誓不再返不能蹈東海西山而死卽溝壑道路無恨
也戊戌六月竟坐死於嘯臺之傍予意其死嘯臺也
謂公和無妻子已亦鰥夫或有所慕悅於心故從之
遊耶生之行徑踽踽涼涼爲世人所吐棄但其立志
不苟食不苟生此中固有異焉者矣生當死之日新
三賢文集 徵君卷之三 星

鄉紳士有欲爲立傳者詢於予予曰史多失真非毀
卽譽自非聖人則不能無毀譽也生少知識乏才技
以衣冠子貧窶不能自養遂甘心一餓亦愚矣然其
所不可及者生死之關勘破已久欲死卽死絕無沾
滯此非有過人識力未足與語也予與生之父爲年
友嘗欲師事予予以世誼謝之今與同人鑄一石於
墓側而記其顛末不欲以不情罔後人也

魏義士墓碑

魏義士諱敬益字士友容之沙河里人也墓在里之
東北去縣城十里許義士生於元之季迄今三百年

餘名載元史孝友事傳列新舊聞人所題詩卷中亦
既昭然可垂不朽矣然丘壠荒蕪牧童樵子偃仰坐
卧其間子孫且恐久而迷其處安所令懷古者指而
憑吊之乎且義士身前後經兵燹之擾者屢矣萊
陽劉克極以清苑丞來攝令事慨然曰義士墓不可
以無表卽以煩子余因憶空同之言曰表者揚之名
而勸之義也是故表死以勸生也表其先以勸後也
表之鄉勸鄉也勸鄉以風國也風國風天下也然則
今之表於墓者獨達官貴人則有表不然亦其子孫
之爲達官貴人則祖父得借以表而生平行誼真可

三賢文集

徵君卷之三

巽

以勸鄉勸國勸天下者則未嘗過而問焉噫表之義
豈如是而已耶義士還田十頃其施實德於民行聞
於朝名徧於野三百年後愈令人歌舞不衰此段精
神入於世數之中超於劫數之外固不煩儒生俗士
以爲表第欲比閭族黨之中遠近親疎之際盡消鄙
吝以遊醇風誰實勸之哉則表之所不容已余不佞
所以復劉使君暨公之子孫者也余因而思之還田
一事士人大節此慷慨節俠千古義士然元史何以
不入義士傳而列孝友傳此其故何也蓋天下未有不
孝不友之人而能爲義士者也亦未有真孝真友

之人而多行不義者也况史稱義士性至孝居母喪
哀毀骨立則義從孝出方非襲義則義士墓卽謂之
孝子墓也亦可墓表其大者三百年後其可表而無
從表者自多矣

明江西道監察御史贈太僕寺卿磊石吳公墓

表

嗚呼此有明天啓間逆璫煽虐死忠諫江夏吳公之
賜阡也當天啓時太阿下墜羣少成倚附奄人內外
之黨旣成鐘簷之屬罔問朝臣之以諫言取顯禍實
應山楊忠烈公於甲子疏二十四罪首攻之乙丑黨
三賢文集

徵君卷之三

晷

禍大作一時正人淪喪國家之元氣亦隨焉時御史
江夏吳公以極論次輔丁紹軾欺誣狀矯旨廷杖死
嗚呼公與應山皆楚產也孽奸之疏愍忠之綸國史
野乘固大書特書矣今逾四十年公季子琮任丘令
介肥鄉賀子應旌寓書幣走使蘇門索表墓之文噫
余伏草莽間病且老言烏足爲公重哉憶乙丙之際
楊應山逮後當時所稱左魏周諸君子皆不棄予予
得周旋其間其子弟皆以予與鹿江邨爲歸伊時雖
不及挹公顏色而芸夫牧豎道公雖死猶足褫奸人
之魄今四十年後復得與任丘君通尺牘將於野人

一言傳信於後世烏可以衰老辭公姓吳氏諱裕中
字磊石號敬菴其先江西萬載人自辛七公始徙江
夏七傳至壁山公居古僊人山以積學教授里閭姓
方巖躬勤儉積粟至數千石當萬曆戊子己丑間歲
大饑公廉其值以出估至貧者樂予之不責償所全
活甚衆鄉里德之壁山公生四子公其季也幼秉岐
嶷雙眸炯炯如電玉歲授句讀一日自外持兩梨歸
奉父母父摩其頂曰孝子公應聲對曰忠臣壁山公
深奇之公有三兄皆著聲庠序屢躋棘闈公父督課
備至恚曰教子逢年不如力田父母獨指公語曰此
三賢文集
徵君卷之三
吳

子屢有異徵天豈終厄我哉未幾壁山公歿公自是
聞母訓益感憤攻苦筆墨中特有涕淚痕嘗作敗子
篇以自警萬曆乙卯舉于鄉讀書山中不事干謁已
未成進士內閣賀公對揚序其文曰磊石自言讀書
做人冀歸諸形影相質之地此可得公之所學矣授
廣東順德令順爲廣劇邑事無巨細綜理靡吝尤水
蘗自矢邑有陋規吏凡二十四曹各以其事之繁冷
第而上之至三十金名曰公堂以逮鹽商給引舟師
告郵民間請示請照皆有常例公拂衣起曰此賈人
行耳謂爲民父母何一切斥絕之公自諸生時詣里

胥奸弊於徵收糧賦更得宵察而吏不能肆其欺冒
他如置石關修海門嚴武備獎士類廉能聲大著東
粵間兼攝新會象邑有猪頭山稱盜藪蹂躪鄰邑無
寧歲公力請於監司建署移官又設哨兵二幢往來
以壯聲援民利賴之辛酉分校棘闈所取多知名士
後區聯芳官臺諫以直聞王戊乙丑兩舉卓異入爲
江西道御史巡視皇城當是時群小嗾逆奄羅織忠
讜次輔丁紹軾內黨客魏外怙崔田舉朝側目無敢
出一言公激烈慷慨於十二月二十四日夜列香燭
肅朝服昭告二祖列宗曰國事一旦至此誓不與賊

三費文集

微君卷之三

吳

臣俱生濟則君之靈不濟請以死繼祝訖伸緝具疏
稿未數行風旋滅燭者三公怒叱曰何物鬼伯輒肆
狂侮厲聲呼童子速續火頃刻稿就其畧云次輔丁
紹軾本一奸邪巧令之小人矢口經濟大率謂人人
騙官事事嚙實有題目而無文章臣初怒焉心折以
爲或出忠愛近被臣同官趙胤昌有言乃輒具疏求
去巧作如簧之波陰結倚叢之局而其人之中藏已
逼露矣紹軾咬定題目重複發揮只謂緣馬世龍而
去可謝天下可報皇上夫世龍一操戈環甲之武臣
耳世龍之去留何足以謝天下何足以報皇上當今

丙有客魏之交通外有崔田之暴橫人情慘於網罟
國勢危若累卵如此重大題目紹軾絕口不肯言漢
席文章僅借輕描淡寫之世龍以塞責直有不可解
者方今善類幾空邪焰彌熾所稱受特達知遇以久
安宗社者其道安在是驅官者次輔鑿實者次輔有
題目而無文章者次輔悞國欺君莫此爲甚二十五
日奏上問票擬已有旨了姑不完了輔曠崔魏籍旨
削奪廷杖一百緹騎控馬索公公適往某侍郎家同
雨諫垣兩席常袍服未易而緹騎至四座相顧無人
色公獨從容向前曰昨具小疏入告此來必爲我被

三賢文集

徵君卷之三

辛

執牽挽去抵午門拜杖血飛如注肉成糜骨節碎折
猶聞誦天子聖明不絕口稍避語所知曰杖亦君恩
惟具小疏四篇纔入告其一耳諸君當爲我稽後三
疏次第封奏可告無罪於先王又語侍者曰母氏遠
隔數千里豈知兒今夕爲國死未幾氣絕時丙寅正
月初二日也公死諫者走報了輔了方手茶碗墮地
碎俄見吳御史從外來驚惶失措相與力持庭前但
僵身連呼曰不干我事不干我事越二日了無疾死
公訃抵江夏闔門惶怖匿不以聞公母母瞿然驚曰
兒其以諫死乎兒能學滂身得爲滂母足矣戊辰崇

頑卽位追卹死諫諸臣贈公太僕寺卿恩褒三代蔭
一子入監讀書賜祭葬冊命謚詞有曰楚材催折者
多矣而爾獨杖杖或不至死爾且死爾冤極矣其加
謚如法以表忠冤嗚呼公之死可謂不辱其身不辱
其君與親矣高陽孫文正挽公曰世人微富貴遂媚
要人至殺其所欲殺以媚而兼殺其怗我富貴者以
爲不如是無以長富貴會無何頓損其富貴之身也
當時操刀之奄已大肆其殺機而腹刃之奸隨先奪
其虎翼一死御史尚可維國祚於苞桑獨悲其拜杖
待斃之頭猶殷殷以三疏未上從容絕命死不忘君

三賢文集

徵君卷之三

五

昔椒山公以誅嚴嵩而先死嵩卒爲椒山所誅磊石
公以擊丁紹軾而見傷紹軾隨爲磊石所擊忠竟烈
氣不獨有撐世運抑且蚤鑒殺機于載下讀公之文
過公之墓未有不腐心肅容流連涕泗相與感憤而
興思也公生萬曆乙酉年僅四十一歲子男四長窾
以蔭入太學次巖次瑑俱廩生次琮卽任丘君也女
三孫男十七孫女六曾孫男十一曾孫女七婚嫁詳
年譜任丘君追念先型殫心實政應有以慰公地下
之望道 躋曠衰耄敬吮毫而應千里外之請

明欽命審錄山西刑部四川清吏司主事蓋勇

胡公行狀

癸未春余以鴛原之慟卧病西山適長君或以公之狀相託情致惋惻誠不忍負然當此沉痛沉疴並灼中腸欲泚筆而寫數十年骨肉姻契實未能也繼而長君復過余謂先子生平行誼須得借知己之言以垂示子孫今誌文未具尚虛此狀以待君言余念與公交既深且久故不忍終以不文辭公諱向化字蔡之號欵華改燾明世家容城之王笞里講稱始祖爲元進士叅知政事廡再傳卽元進士炳南醜襲靜修者又傳而爲明光祿少卿實次至處士世臣以讓產

三賢文集

徵君卷之三

三

著聲海內卜鄰於城世臣生崇崇生九德太學生九德生忻是爲公父母王生公兄遵化並公公生甫十齡母王先殞繼母劉不三載亦殞再繼又劉公生而有介性受學邑諸生張繼川張篤行士也深器之一歲能屬文十五歲補博士弟子員十七歲娶於侯爲邑明經侯約所女侯固名宿公乃依居岳氏而問業焉生計緇租他氏地四畝爲業侯甯入佐以紡績如是者十年惜寸惜分下帷之志甚堅絕口不道佛老惟喜讀性鑑左史及唐宋八大家諸書詞記程墨並先正名篇千餘首方弱冠卽錚錚爲畿輔知名士

乃數不利於棘闈歲辛亥父捐館繼母劉亦謝世公與伯兄襄厥大事情儀兼備天啓辛酉領鄉薦刻三折草告同人曰我非自多其文俾後進知困蹈如某猶倖成名而才識倍某者益宜自鞭爾房師行人襄陽繡嶺王公維周得公甚囑公平生恥晤中黃鹿鳴後寓都門月餘同里中瑄類多想望丰采而不可得適某思引爲重介鄉人貸以百金峻卻之居恒以敦風俗掖後學爲第一義忠孝節義急激勵表揚嘗自謂不以熱賜走富豪之家不以冷眼待孤寒之士素與王周靈孝廉最善周靈亦介然無濫交故不禁三賢文集 徵君卷之三 登

其聲氣之自投爾乙丑丙寅逆璫煽禍羅織名流左浮丘僉院逮繫道經白溝余間未及往適公過余曰一日之知千載之感卽時同余就道省視時逆焰不可嚮邇邏者絡繹於途人咸爲吾兩人危而余察公之神情則毅然無怖容也相晤之際緹騎四五人數數密語公昂然伸感恩知己之意并祝爲國爲親珍重此身若絕不知緹騎之伺其旁暨左斃金吾獄復捐資倡義嗟乎受一日之知者獨公也哉平日至戚執友門生故吏思羅豺虎之鋒斂跡弗敢爲寒溫足當公之一盼乎三上春官弗遇庚午謁選得山東之

新泰縣放官利者爭持金相貸笑而謝之兵房吏循故事攜公費銀百兩以進亦力斥之鬻產一百餘金作路費下車之日知地方最苦莫如攤派凡朝觀祭祀鄉飲及一切查盤供應計數十款不係正賦追呼更迫官吏借公自潤額外征求淺敲憚人之髓矣公悉報罷歲省萬餘金奸吏徐管欺朦前令盜庫銀二千餘兩公竭心力察覈擬管以戍衙役肅然納糧令花戶自封折時總兌從未拘一輕封者而耗金悉革歲例積穀二百五十石清察倉穀溢原額三百有奇公謂例積有抵年餘未罰一粒日用蔬薪及一切下

三賢文集

徵君卷之三

著

程酒席悉照時估不用行戶叛弃作亂八日陷濟屬六城賊焰熾且逼登陴固圍兼之器具芻糧催檄如雨皆自官設法立辦士民若不經軍典事至矯發倉粟買補耕牛杜奸人以丈地擾民嚴師巫以邪說惑衆勤月課以興起人文撫流移清茱符繕城隍禁遊賭何一不從地方起見登薦剡十二次士民立祠尸祝之鹿伯順序之日子視其民如蓋明乃可作親民官耳任新三載餘一署萊蕪書不受萊人一米一萁錢糧旋收旋解與官庫無涉舊例收條鞭銀錢半之前令俱勒輸銀人皆稱苦公令銀三錢七以從民便

一署泰安先是州屬徂徠寇發公報觀察統兵偕至
其地擒梟渠五六十人脇從罔治州境帖然自是州
人繫心於公而諸大吏亦以是多公治績遂命攝州
篆理劇劇繁不遺餘力會泰安逋糧民間拖欠暨胥
吏侵漁計其數至二十有八萬公徹底澄清而庫額
明晰署事五閱月未曾罰片紙闕例積穀數出新泰
俸金二百二十六兩貯庫以抵之癸酉冬主爵者以
政通民和擢錦衣衛經歷舊弊旗尉借緝訪以嚇人
或包攬民訟朦官票提而官亦有從而猶鼠者動稱
叅送莫敢誰何公嚴禁衙蠹毫不預都民諸事積虐

三賢文集

徵君卷之三

五

革而民害患也乙亥二月陞刑部四川司主事委署
司篆揆理原情多所平反而又主以清直適朝審有
罪當擬碎托要人求解網卽詞嚴義正以拒之公務
之餘登署中白雲樓和李子鱗王元美詩有云拙宦
病難轉清譚醉易醒又云醫塵天半洗幽况座中收
胸次澹遠照然可見丙子奉命錄山西因有罪弁以
請托冀釋公謂此時爲朝廷重封疆若豈可援於疑
例有寬婦王氏委屬覆盆緣事闕藩府人不敢問公
曰事應如是無妨也總以介然不徇情不懼勢之心
雪冤理枉釋罪犯八十八人司寇鄭玄猷稱其明允

勤慎核敘第一時軍興蹂躪內地吾邑城雖無恙而村落被掠更慘於鄰封公慨然上疏請蠲糧馬以蘇民困敘功次卹節烈以獎往勸來奉有該撫按察明速奏之旨一時令尉學博俱蒙優敘士民烈婦俱隸立坊定興安肅殉難者亦並入告其疏鹿太常善繼有云生爲理學主盟死爲封疆殉節與居城內城破而不得不死者迥別後贈謚祠全明異數余仲女爲定興諸生楊士弘妻攜二子一女同死於井亦得建坊旌表此公之亟亟於節義也亦惟其身實有之哉回部復委署篆挽黃之役欺誑焚侵屢有嚴旨罪

三賢文集

徵君卷之三

五

司官未敢輕議公謂此事自有應坐之條而必入河臣以侵欺之罪平允之謂何仍從前擬具疏一時入服其擔當丁丑七月入署墜馬致疾懇堂官代題得旨回籍調理卧病之日獨眷懷前世爲遠祖炳南修復祀典詳在前徵配享集爲高祖世臣徵文海內詳在前徵讓產集又以所居宅立爲宗祠爲祖塋立碑爲兩先人表墓此皆仁孝之事若修城餉兵繕文廟置學田賑饑民種種急公恐後至爲兄妹製棺完葬爲業師繼川房師繡嶺設主致祭更於名教有裨壬午春銓部疏起公忠愛念切遂自七月入都城舊第

飽圖報効孰意天摧棟樑比冬暮故疾轉劇遂不起嗟乎公清介天植嚴冷性成賄賂不能搖權勢不能奪租地四畝若將終身歷官八年依然初意淡薄自矢能不爲人所爲職掌獨修能任人所不任旣無歛於本分之內自不愧於屋漏之中居官居鄉不隨不詭如公者始古之遺直而邢之清流與生於萬歷癸酉九月二十九日卒於崇禎壬午十二月初五日卜以卒之明年五月十七日葬於縣南八里東牛之原子二長或廩生娶邑廩生王之俊女繼娶邑庠生陰調元女次穆上林苑監署丞娶余弟武城縣知縣孫三賢文集

徵君卷之三

五

奇彥女繼娶雄縣廩生王夢祖女穆先公卒女一適邑庠生王杲男京衛武學官生王曄然孫男二長存仁娶新城貢士董其成女次戴仁聘雄縣舉人楊雲翻女俱或出戴仁爲穆過嗣

